

Duzdouq Vihmaz Deuz Ne

上林县大丰镇中心学校四(2)班 Veiz Yinhdungz/韦欣彤

Duzdouq, duzma caeuq duz-mui dwg baengzyoux ndei, gyoengqde caez bae lijyouz.

Gyoengqde byaij daengz henz dah iq ndeu, raen ga giuzfaexdog ndeu. Sam boux doengzdoh gvaq giuz. Baez mbouj re le, duzdouq doek raemx lo. "Aiya, gouqmingh, gouqmingh, duzma, duzmui, vaiq daeuj gouq gou." Duzdouq doq cak doq hemq. Duzma mbwqmbwt naeuz: "Gou langh roengz raemx gouq mwngz, buh gou couh dumz liux lo, dumz le couh deng dwgliengz, mwngz ceiq ndei heuh duzmui ba." Siengj mbouj daengz duzmui hix mbouj gaenj mbouj vueng naeuz: "Gou mbouj rox

youzraemx, roengzbae gouq mwngz gou lau dai, mwngz swheij hwnjdaej ba, dou youq henz hamq caj mwngz." Duzdouq buek-mingh cak, doeklaeng gaem dawz diuz gaeu gouqmingh ndeu, ndaej hwnj hamq lo. Duzma caeuq duzmui byaij coh naj de bae naeuz: "Duzdouq mwngz baenzlawz yiengh la? Mbouj miz saeh ba?" Duzdouq doiq song boux baengz-youx neix lumj yawj mbouj raen nei, caemsim naeuz: "Raeuz byaij vaiq di bw, mbwn yaek laep lo." Gangj sat, gyoengqde youh byaij roen lo.

Cingq byaij dwk byaij dwk, sawqmwh doek fwn hung lo, duzma

ganjgip daj ndaw daeh dawz ok aen liengj ndeu, caeuq duzmui caez gang liengj, caemhcai doiq duzdouq naeuz: "Duzdouq, liengj gou iq lai, mbouj ndaej gang sam boux vunz, rwz mwngz youh hung youh raez, mwngz beng rwz daeuj dangj fwn ba." Duzdouq mbouj guhsing, dawz daehsaw dangj coq dinggyaeuj, mbouj oksing deuz lo. Duzma caeuq duzmui roxnyinh geizheih, simsiengj: "Duzdouq vihmaz gag byaij deuz ne?"

Siuj baengzyoux, mwngz rox duzdouq vihmaz gag byaij deuz lwi?

(bouxlauxsae son' gyauq: Vangz Gveiyangh/黄桂香)



—Haemhlwenz, duzroeg-gap mong deng duznouguk gamz deuz gvaq. Haemhneix, ndaw roengq roeggap gag lw duz roeggap hau gyaxgedged ndeu ndwi.

Valwgbaeng gwnz led ninz ndaek gvaq, duzroegenq gwnz yiemhranz ninz ndaek gvaq, roeggap hau ha, mwngz hij ninz vei.

Gaej daejnga'nga lai lo, roeggap hau ha, gaej saeq beixmbauq gou naeuz, gou goj mbouj saeq de naeuz ne—roeggap mong mbouj dwg hawj duznouguk gamz bae go! Duznouguk mbouj miz fwed, de mbouj rox mbin go.

Roeggap mong bae gizlawz liux ne? Guhlawz lij caengz dauqma ne?

Gou naemj, haetneix, de youq mwh mwngz caengz ninz ndiu de, gag mbin bae ndaw ndoengfaex louz lo. Mbangjbaez, de mbin bae gae'gyanggyang nei, mbouj rox youq gizlawz deng mok raemhruru laepngaungau nei, loeng roen le, mbin mbouj dauq lo.

Ngoenzcog, mok sanq le, de couh dauqma lo.

Mbangjbaez, youq ndaw mok laep, de mbin bae daengz giz ndeindei youh gyaundeidei dangq-maz ndeu—giz lumj bouxsien ndaw gojgaeq daxboh gangj de go. Gizde daengngoengz mbouj doekcong nauq, gizde mbouj miz gyanghaemh, ndokva seizseiz cungj dwg hailangh youq gyang nditndat, duzroeg seizseiz cungj dwg guhfwen youq laj raemh-faex……Roeggap mong mbouj ngah deuz, yienghneix couh lumz doxdauq lo.

Hoeng, roeggap coj miz ngoenz ndeu dauqma dahraix.

Couhsuenq giz bouxsien youq de gyaundeidei baenzmaz bae, roeggap gag youq gizde, goj rox mbwqlinlin, de coj dauqma.

Sou ngoenzngoengz caemh youq caez guhcaemz, couhsuenq giz bouxsien gyaundeidei baenzmaz bae, goj ndei mbouj gvaq gizneix, de coj dauqma go.

Gaej daejnga'nga lo, roeggap hau ha.

Ninz vei! Ninz vei! Roeggap hau ha, mbangjbaez haetcog, mwngz baez hai da, duz roeggap mong couh youq henzgyawj mwngz lo.

(Daj《Bonjsei Sim Lwngnyez》
(Veiz Gizlinz raiz) senj okdaeuj,
Lwgfwnzgmeh/卢奋长 hoiz)

Gou Itdingh Baenz

Duenh gonq, lauxsae lwnh naeuz: "Hagdangz yaek cujciez nienzgaep daemq doxdax gangj gojgaeq cojciez, caezgya aeu doxcanj bauqmingz bw!" Gou baez dingq, da lai rongh lo, aenvih gou gyaez gangj gojgaeq; danhseih lwgda gou youh laep dauq gig vaiq, aenvih gou ngeix daengz doxdax gangj gojgaeq dwg gienh saeh daegbied mbouj ngaih ndeu, gou boux vunz sij saw mbouj cingq, hwnjdangz ngeix sam ngeix seiq neix, gangj gojgaeq ndaej ndei lwi?

Dauq daengz ranz, daxmeh dingq le gij naemjap gou, rub aen'gyaeuj iq gou naeuz: "Mwngz baez gonq youq Suhcouh Si gangj gojgaeq doxdax ndawde ndaejciegj gvaq bw, gou genyi mwngz gaemdawz gihvei bae sawq mbat ndeu!" Gou baez ngeix le raen hix doiq, ndaw hagdangz doxdax wnggai beij daengx si doxdax lai ngaih, neix gou couh caeuq lauxsae bauq-mingz lo. Danhseih gou ndaw sim vanzlij miz di mbouj caemdingh, cungj naemj: Gou dauqdae gangj ndaej ndei mbouj ndei?

Gou senj aen gojgaeq dwg 《Nyaenma Baengh Vifung Duzguk》, gou moix ngoenz gangj de baez dem baez. Lienh gangj seizhaenx, gou raen gij mbouj ndei swheij lo, beijgangj: Ngamq heij gangj daengz gij vah

duzguk caeuq nyaenma, gij sing gou doxlumj caez, neix bouxdingq baenzlawz rox dwg duzlawz gangjavah ne? Daengzlaeng gou aeu gij sing bozbod haenx yienj duzguk, aeu sing hepsaeq yienj nyaenma, yienghneix guh couh lai sengdoengh lo! Mizseiz, gij ningdoengh gou unqnemnem nei, mbouj gaenj saek di. Gou doq lienh, doq gaij, yawj ndaw sibinz swheij yied gangj yied ndei, gou hix menh-menh miz goekdae miz saenqsim lo.

Daengz ngoenz doxdax lo, gou ndawsim lumj miz cibhaj aen doengj-venj—caet hwnj bet roengz nei. Youq gwnz daiz gangj seizhaenx, gou doq gangj doq caeg yawj bouxdingq baihlaj miz maz fanjwngq, gyoengqde mizseiz ngiengx gyauej riu, mizseiz aj bak riu. Gou ndawsim mbouj daih caemhdingh, aenvih gou ndawsim hix riu, danhseih gou youq gwnz daiz mbouj ndaej riu bw!

Gangj sat roengz daiz daeuj, gou roxnyinh gou caen ak, danhseih hix mbouj rox ndaej geijlai mingz. Fat ciengj lo! Siengj mbouj daengz gou gingqyienz ndaej ngeihdaengjciegj! Va! Gou seizneix maqmuengh doxdax gangj gojgaeq dangqmaz bae, aenvih gou simsaenq baez laeng gou itdingh ndaej daih'it mingz.

(Sau Yisungh/邵逸松)

